

#### 4. MARIA MAN ELISABET : KAREPOATN KA' AHE NANG DI TUHAN ALLAH PANJAWAT

##### TEKS : LUKAS 1:39-56

<sup>39</sup> Ina' lama laka' koa, Maria capat-capat ampus ka' abut nang babukit-bukit ka' sote' kota nang ka' wilayah Yudea. <sup>40</sup> Ia ampus ka' rumah Elisabet man Sakaria. Taka' nya sampe ka' rumah Sakaria, Maria bakata ka' Elisabet, “Kira'nya baati nang dame kita'.” <sup>41</sup> Taka' Elisabet nangar kata Maria koa, kamuda' nang ka' buntikng Elisabet koa bagarak karepoatn, Elisabet pun di Roh Tuhan Allah nguasai'. <sup>42</sup> Lalu ia bakata nyarikng, “Tuhan Allah dah nojokatn kabaikatn ati-Nya ka' kita' lebih dari nangbini-nangbini lain. Man dibarokatia' Kamuda' nang di kita' paranakatnna' koa. <sup>43</sup> Sidi reponya aku, biarpun aku ina' pantas tapi uwe' Tuhanku atakng ka' aku! <sup>44</sup> Taka' aku nangar salam kita', kamuda' nang ka' buntikngku bagarak-garak karepoatn. <sup>45</sup> Barepo-repolah kita' tagal kita' pucaya', kade' ahe nang di Tuhan Allah ngataatn ka' kita' jaja'!”

<sup>46</sup> Jakata Maria,

“Aku muji Tuhan Allah,

<sup>47</sup> Ia nang nyalamatatn aku,

tagal Ia, aku sidi karepoatn.

<sup>48</sup> Jukut Ia dah maratiatn aku man kasih-Nya,

amba ulutn-Nya nang ina' dipandang ka' masarakat!

Bamula dari ampeatn man sampe satarusnya,

sigana urakng bakataa' kade' aku sidi repo.

<sup>49</sup> Jukut Tuhan Allah, nang sidi bakuasa,

dah manjawat hal-hal nang luar biasa ka' aku.

Pujilah Tuhan Allah, jukut Ia kudus!

<sup>50</sup> Tuhan Allah kaja nojokatn kabaikatn-Nya tiap wa'tu

ka' urakng nang gali' man hormat ka' Ia.

<sup>51</sup> Man kuasa-Nya, Tuhan Allah manjawat hal-hal nang luar biasa,

Ia macareatn urakng nang baati sombong, man ngagalatn rencananya ka' koa.

<sup>52</sup> Ia nurunan urakng-urakng nang bakuasa dari kadudukatn kuasanya,

tapi Ia mare' kuasa nang tingi ka' urakng-urakng hina.

<sup>53</sup> Tuhan Allah mare' sigana hal nang gagas ka' urakng nang masikin sampe ia ka' koa jaji

puas,

tapi urakng kaya di Tuhan Allah suruha' dari, man ina' ngincakng ahe-ahe.

<sup>54</sup> Ia manto' Israel amba ulutn-Nya,

jukut Ia ina' ngalupaatn ahe nang dah di Nya nyanjiatn

ka' ene' uyut diri'.

<sup>55</sup> Ia bajanji kade'

Ia nojokatnna' kabaikatn-Nya ka' Abraham

man katurunannya sampe salama-lamanya.”

<sup>56</sup> Maria badiapm man Elisabet kurang lebih talu bulatn lamanya, baru' ia pulakng ka' Nasaret.

##### PAMULAATN

Wa'tu jaman Yesus, nangbini dinganggap ina' barati. Ia ka' koa ina baya jaji saksi ka' dalapm pangadilan. Ka' Rumah Kudus Tuhan Allah ia ka' koa ina' di ijinan tama ka' alaman tengah lea nang diijinan ka' nang laki. Tapi ka' dian, ada dua urakng nangbini nang pasti di masyarakat

nganggap nana barati. Nang seko' baru' babuntikng biar pun nape' panganten, nang seko' agi' dah lama ugu' tapi dah tuha baru' baranak. Tapi wa'tu nyadua batamu nyadua sisi karepoatn. Nyadua ina' di ijinan tama ka' alaman tengah ka' Rumah Kudus Tuhan Allah, tapi ampeatn di roh Tuhan Allah babaro nguasai'. Man akibatnya karepoatn man pujian ka' Tuhan Allah. Ahe nang manjawat diri karepoatn? Ahe nang jaji sumber karepoatn diri'?

## **NANG DITALITI**

- Ahe nang jaji taka' Elisabet nangar salam Maria? (ayat 41-44)
- Ahe nang di Elisabet pucaya ka' Kamuda nang di Maria mabuntingan koa? (ayat 42-43)
- Ngahe Maria di sabut sisi karepoatn? (ayat 45)
- Ahe nang dah di Tuhan Allah panjawat untu' Maria? (ayat 46-49)
- Dari pujian Maria urakng nang lemae nang di Tuhan Allah paratiatn? (ayat 50-53)
- Lemaе kaatangan Yesus jaji talino bakaitatn man janji Tuhan Allah? (ayat 55)

## **NGAGOI MA'NANYA**

- Pajalanan dari Nasaret ka' daerah pagunungan ka' Yudea cukup jauh sampe tiga ari pajalanan. Kira-kira, ngahe Maria mao basaroh ka' sodaranya Elisabet?
- Ka' dalapm ayat 51-53 dingataatn kade nang bakuasa di turuntan, man nang hina di Tuhan Allah tingian. Kira-kira ahe hubungannya nian man kaatangan Yesus?
- Dari pujian Maria ahe nang kita palajari ka' sifat-sifat Tuhan Allah?

## **PENERAPAN**

- Taka Maria man Elisabet bapikir ahe nang di Tuhan Allah panjawat ka' nyadua, nyadua sisi miah karepoatn. Lemaе sih rasa karepoatn ka' dalapm kaidupatn sodara ampeatn? ahe nang baya manjawat sodara labih agi' karepoatn?
- Wa'tu Elisabet nele' Maria, ia langsung turut karepoatn man nguatatn panggilan Maria. dalapm kaidupatn sodara, ahe ge' ada urakng nang manto sodara labih pucaya ka' Tuhan Allah? Ahe ge' ada urakng lain nang bisa diri' bimbing man diri' kuantan uga'?

## **BATUKAR PANDAPAT**

- Ahe pantingnya muji Tuhan Allah ka' dalapm kaidupatn urakng Karisten? lemae caranya diri' bisa muji Tuhan Allah?

## **NANG ARUS DIRI' PANJAWAT**

- Tulis lagu ato puisi ato doa untu' ngungkapatn rasa karepoatn ka' sigana nang udah di Tuhan Allah panjawat ka' sodara.

## **DOA**

- Basukur ka' sigana nang dah di Tuhan Allah panjawat ka' dalapm kaidupatn sodara.

Badoa biar Tuhan Allah nambahatn ka' sodara karepoatn nang aya', man manto' sodara turut karepoatn man nguatatn urakng lain.